

居易軒詩文

居易軒詩文

珏生藏本

居
易
軒

與
顧
豪

吳式
釗署

戊子年
榮子壽



劍川州志人物傳

趙炳龍字文成父完璧有傳炳龍崇禎壬午舉人幼有異秉謙謹廉幹事繼母如所生繼母亦篤愛之鄉閭以爲難研求經世之學工詩古文辭金滄道楊畏知聘司記室沙定洲寇楚雄畏知擊卻之用炳龍策爲多後隨畏知至肇慶桂王以畏知薦授炳龍吏部文選司主事遷戶部員外郎隨蹕至貴州安隆所孫可望旣殺畏知又殺大學士吳貞毓等十八人炳龍慨然投劾歸隱於向湖村之楸園葺廬曰居易以彈琴賦詩自娛詩多寓

君國身世之感哀怨悱惻讀者淒楚鼎革後足跡不履
城市吳三桂反脅以僞命避石寶山中不出卒於康熙
三十六年著有居易軒詩文鈔八卷

居易軒詩遺鈔

劔川趙炳龍雲升

四言

有槃五章題壁

鳥聲在上泉聲在下有槃此中其人孔暇其人孔暇不
圃不稼不圃何蔬臨溪而魚不稼何食農有餘粒
暑屏白雲寒餐絳雪晨書媚霞夕尊颺月今人嘒嘒
古人囂囂匪今嘒嘒匪古囂囂唯伊人之陶陶彼伊
人兮槃中之人兮是耶非耶其槃中之人兮

居易軒詩文
一
永憂六章述懷

永憂紛只瞻白雲只雲之沍只美人其慙只 彼美其
慙實勞我心往將與羣山高水深 榛苓在西黍苗在
東西天孔遙東流曷窮 如鳥斯飛垂翼暮途如鹿斯
奔離羣而呼 呼羣者鹿垂途者鳥人何以堪百憂用
老 維玉在山維谷有蘭攜彼德方劭哉先賢

惜菊五章責守館者不閉牧也

菊之香兮蔚秋芳兮嗟胡爲其不芳而飽之犬羊 物
則鮮知兮疇實縱之傑士之凋謝兮我心則悽 霜風

蕭蕭石煙條條猿鶴寂寥魂歸曷招 蒔汝護汝憐汝
風雨竭我心膺同我羈苦而何遇非其主我亦無所處
故園三徑悠悠我心歸去來兮偕老其陰

今夕五章思古也

今夕匪月我亭寢白明燭未發水天之潔 風來徐徐
遠山差差夜涼何多秋聲滿籬 放鶴歸只鵲南飛只
美人一方思依依只 匪思則夷德輝蔽之待旦而坐
聖修所師 倘焉今夕坐古人宅彼夢洎者無乃爲跖

黃鵠六章安寓也

翩翩黃鵠來自南陸遵渚而宿渚則有宮渚則有梁
維鵠徜徉于嗟鵠兮將高舉兮而雲嶠其修阻兮
于嗟鵠兮將遠遊兮而決滯其無限兮婢鵠其侶倡
予和汝慎爾出處可止暫止可棲暫棲順造物之時
採菊三章寄高澹生
採秋菊兮東籬霜華碎兮霏霏招隱士兮何時歸一採
秋菊兮東皋霜風發兮蕭蕭思公子兮中心搖

7 廣烹魚四章

誰能烹魚佐之鹽梅誰將西歸報之瓊瑰誰能烹魚

言飲其腥誰將西歸言潔其輪 我思美人盈盈一方
匪美人其曷歸歸美人兮而心徬徨而道阻且長 我
思美人憂心如焚匪美人其曷歸歸美人兮而足逡巡
而不敢以告人

廣巷伯九章

日兮月兮過則見之更而仰之誰其黨之 堅兮白兮
磨而涅之雖磨涅之祇自絕之 辛兮螫兮毀我肌膚
雖毀其膚而骨自如 蠅兮蚋兮爲徒孔繁彼穢者口
易牙不全 鬼兮蜮兮爲形弗彰如譟如讐蘇公見傷

虺兮蜴兮爲心孔艱糜而燼之沈諸重淵 重淵毒
鱗怒彼長舌旣吮其軀終殄其魄 胡爲不悛鱗於江
潭沿流吸沙浸潤屈原 嗟彼譖者如簣亂聰人亦有
言多言數窮忠而見謗君誰與忠

去故都三章

去故都兮山水其長人之云亡涕泗其滂典型之猶在
兮殫高仰而景行 去故都兮雨雪其霏人之云亡麟
鳳其悲明王之可宗兮孰操蘭而茹薇 去故都兮歲
月其沈人之云亡禾黍行吟我心之永貞兮懼愆修而

忝親

無同心三章

國無同心兮放我江潭居不可卜兮行歌而自憐
國無同心兮率我中野虎兕之旣羣兮衣褐皮以爲雅
國無同心兮斲我嚶鳴依先民以爲則兮慰羹牆之我
親

維彼青山四章失羣也

維彼青山石巉巖兮維彼流泉水潺湲兮有美一人山
水之間兮山之高兮猶可牧兮泉之流兮猶可浴兮

彼美人兮其不可瀆兮 山高而巉草木翳之泉流而
潺湲絲利之嗟美人之信芳兮仇予而將去之 匪山
必高畏人往還匪泉必流畏人激湍匪美人其若仇畏
人之中道而棄捐

離憂六章閔遇也

欲離憂兮雲天之寄兮白雲縹緲而長逝兮羌予不能
御兮 欲離憂兮靈均之謁兮湘水泱泱而無楫兮羌
予不能涉兮 欲離憂兮帝閭之哭兮聞者伏戟而駢
目兮羌予不能入兮 欲離憂兮傭歌之醉兮漸離瘖

老而謀廢兮羌予不能類兮
欲離憂兮其無所適兮
匪予好勞役兮慄車不可歷兮
欲離憂兮其無所汰
兮匪予樂行邁兮金鬻難自漑兮

石蘭三章念澹生也

石蘭之葆兮芳窈窕兮可以揚予藻兮
匪維藻兮永以爲好兮
石蘭之翠兮紛粹邃兮可以紉予佩兮
匪維佩兮永以爲惠兮
石蘭之豔兮香煥漉兮可以適予
粲兮匪維粲兮永以爲範兮

辭

招鶴辭

鶴兮鶴兮胡不歸松杉靜兮白雲飛怨山人兮啼曉猿
庭寂歷兮空徘徊鶴兮歸來元圃之仙兮難期北山之
客兮疇依胡不戀石牀之露兮胡不愛山亭之暉鶴兮
可歸雲衢萬里兮遠莫致之稅駕風塵兮塵網將羈歷
九州而相其君兮遇之者誰鳴九皋而聽於天兮天高
聽違鶴兮何歸秋江之上兮霜月淒玉關之外兮腥風
吹空腸斷於江城之笛兮空夢冷於孤山之梅鶴兮歸
來勿閒浴於璜浦兮勿長寢於蓬嶠浦有蜮兮嶠有貍

與子其不德兮曷見幾而去之鶴兮歸來勿振衣於千
仞兮勿借巢於一枝千仞之岡兮多險巇一枝之蔭兮
無德輝與其供弋人之篡而歧途掩泣兮曷一邱一壑
之是隨邱有槃兮壑有畸雲樹蒼蒼兮稻梁肥猿同嘯
兮鷺同棲主人出入兮長相攜風月皎潔兮宜所思舞
且唳兮白雲低擇地而蹈兮今其時鶴兮鶴兮胡不歸

樂府

明河怨

夜涼出庭望顧見河邊星習習機杼風織此雲錦青鵲